



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3



Ukraine rara indang jembishinü tang tenzüksü: Donald Trump



Delhi nung AAP sorkar atsüngdokba sülen light ao tenzükogo: Atishi

VOL. XXII ISSUE NO. 121 (ADOK 121)

DIMAPUR

ROGONÜ (FRIDAY)

TSÜKLAI (FEBRUARY) 14, 2025

₹ 5.00

NLA Speaker Sharingain Longkumer-i BAC senden ayonger

Dimapur, Tsüklai/February 13 (TYO): Speaker, Nagaland Legislative Assembly aser Business Advisory Committee (BAC) indang Chairperson, Sharingain Longkumer-i iba Committee pur senden ka February 20, 2025 anüngdang 12:00 ako nungi tenzuka C. Chongshen Committee

Room, Assembly Secretariat nung ayongzükogo.

March 3, 2025 nungi tenzuka 14th Nagaland Legislative Assembly indang Sixth Session atema Provisional Programme renemtsü atema iba senden ya ayongzük, ta sangdong ajanga ashi.

AG ajanga pension revision atema metetdaksür

Dimapur, Tsüklai/February 13 (TYO): Office of the Principal Accountant General (A&E) Nagaland, Kohima ajanga 01.06.2017 masüidang pension alur alir ajunga dang sangdong ka nung, "Nagaland Services (Revision of Pay) Rules.2017 notified vide Finance Department, Establishment Branch & ROP Cell vide Notification No.FIN/ESTT-2/II/VII CPC/16 dated: 06.12.2017 nung shia aliba ama 26.04.2010 nungi tenzuka pension revision maparen tenzükogo aser iba Office indang

revision Cell ya tesüiba küm tenet mapa inyaka arur, ta ashi.

Revision cell ya mapang tatsuka atema amenok saka form menur agütsüba mechi maneni lapoka arur. Tang iba revision cell ya shibangtsü telemtetba agiogo.

Anungji pensioner shirnoksa revision forms ano magütsüi lir, parnoki pei indang pension revision form ya 31.03.2025 tashinung agütsüsüla aser iba sülen revision case tejen kata magizüksü, ta sangdong ajangasa ashi.

Gauhati High Court Judge inyaksü Yangerjungla Longkumer shimogo

Dimapur, Tsüklai/February 13 (TYO): Union Law Ministry ajanga February 12, 2025 nü sangdong ka nung judicial officer Yarenjungla Longkumer ya Gauhati High Court indang additional judge inyaksü shimba metetdaksü. Iba yongji Nagaland nungi tetsürtem rongnung iba menden nung amener la mezüngbuba akumer.

Longkumer tenüng ya Supreme Court Collegium ajanga January 4, 2025 nü agüja liasü, aser ka den advocate Shamima Jahan tenüng agütsü. Iba Collegium nungya Chief Justice of India DY Chandrachud aser Justices Sanjiv Khanna (tangbo CJI) aser B.R. Gavai nungera liasü aser parnoki Gauhati High Court nungi shisa agitepa liasü.

Longkumer ya Peren aser Kohima nung district and sessions judge inyakdanga lir aser Law & Justice Department of Nagaland nunga judicial secretary inyakogo.

La nübu ya India Tir ajanga Chief Justice of India den constitution agi melaba ama shisa agiteper shima liasü.

Gauhati High Court yagi Assam, Arunachal Pradesh, Mizoram aser Nagaland repranger.

Kasa mapang Yangerjungla Longkumer-i Gauhati High Court nung Additional Judge menden ngutetba atema Dimapur Ao Lanur Telungiem (DALT) ajanga tenüngsang agüja liasü.

Iba alizüing tongtetba ya

otsüsütsü lir, kechiaser la ya Ao-Naga kin nungi kisüing masü saka naga tsür rongnung mezüngbuba tetsür iba jenjang tongteter alitsü.

Obendangba tsütsü lai bendanga agütsür inyakba ajanga iba alizüing ya tongtet aser maneni lanurtem ajungmesotsü. Ibai nisung ka kisüing atema masü saka Naga nunger tetsür ajunga atema konang tulu lir, ta DALT sangdong ajanga ashi.

Maneni state nung Naga nunger tetsürtem rongnungi NJA züngsem Yangerjungla Longkumer-i High Court Judge jenjang tongtetba atema tepela lemsateper, ta Nagaland Judges' Association sangdong ka ajanga ashi.

2013 küm Gauhati High Court ajanga agiba Grade-I higher judiciary nung la tematiba jenjang nung shim aser la Judicial Officer ama inyakdang Kohima aser Dimapur nung Principal District and Sessions Judge ka ama inyaka liasü.

La Kohima Bench nung Registrar inyaka arur Law and Justice Department, Nagaland nung Secretary (Judicial) jenjangi ajungket.

Administrator ka ama aser trial Court aser Appellate Court nung Judge ka ama inyaka arudang lai rule of law indang shisatsü taroktiba ngutetogo aser ibaji ajanga Gauhati High Court nung lai takok ngua ochi obendang agütsüsü, ta NJA ajanga ashi.

Centre-i Manipur nung President's Rule benoker

Imphal, Tsüklai/February 13 (Agencies): Anogo asem tejakdang Chief Minister menden nungi anensang N Biren Singh melener kata mongutetba sülen Bodhbarnü Manipur nung President's Rule benokogo.

Constitution agi melaba ama state Assembly tanaben jateptsü mapang atongba sülen Ministry of Home Affairs ajanga iba mera ya agi.

Constitution indang Article 174(1) nung state legislatures ya ita trok tsüingta sessions amentsüla ta shia lir. Manipur nung tesüsaba Assembly session ya August 12, 2023 nü tembanga liasü, anungji

iba ozüing sülen anidaksü asoshi Bodhbarnü ya tatem liasü.

Ajisüaka Singh-i ajungbena Deobarnü mapa menden azüngtsüba sülen Hombarnü nungi tenzüksü aliba Budget session ya Governor Ajay Bhalla-i thitsü.

Singh'er sorkar ya no confidence motion aser floor test ajurutsü ghonda ishika lia pa CM menden nungi alua yimten lao.

2023 küm May ita kin ana tsüingta azüdokshi tenzükba N. Biren Singh-i junga ketdang mesütetba ajanga opposition telok temi pa CM menden nungi alutsü ita aika khanga aruba sülen tang

pai menden yutsü. Iba mepetmesü nung nisung 200 dak tema takum laluogo aser Sing lenisüba nung temulung melemtetaki akum.

Singh-i iba azüdokshi tenzükdaksü ta pai jembiba indang audio tapes ka asadangtsü atema Supreme Court-i central forensic lab ka dang totuyuba agütsür anogo pongu sülen pai iba telemtetba ya agi. Court-i iba report ya hopta ana tsüingta meshir.

Sorkar kumtettsü teimla manguba yong President's Rule ya benok, anungji linük nung küm 20 dak tema nung iba mera agiba Manipur mezüng asütsü.

Tiazü aser ashikülak temai adoktsütsü: WC, NNPG

Dimapur, Tsüklai/February 13 (TYO): Ochi aser shidak tatalokba liaka tiazü poraloka Naga nunger mashi lenmangi anitsü merangba aser pei sasa jenjang balala yanglua yangji ayalokba küboki Working Committee, NNPG malutsü.

Nübur temi junga metettsü asoshi Convener jenjang nungi W/C vis-à-vis N. Kitovi Zhimomi agenba inyakyim dak sendakba nüngdak documents ajunga temai adoktsür, anungji N. Kitovi aser par sepai temi tiazü aser ashikülak mapa inyakba ajunga jangjatsür, ta WC, NNPG sangdong ka ajanga ashi.

Osangbener den jembidang parnoki par shidakba sentsü sayuogo, anungji lenir ka asütsü asoshi iba amala yimya ya ajung asü majung, metettsü asoshi Naga nunger atema maongka tajung lir.

GPRN/NSCN (U) indang Ato Kilonser menden nungi workers shilem 99-i mulunga mapa nungi anentsür iba sülen par teloki W/ C menden nungi jazükaka W/C lenirtemi tesüiba ita toku tashi pa jenjang tajung ka atatsütsü asoshi temulung agüja inyak, saka pa dak khenyongi pei kisüing agitsü bilemba mulungsentsü aluba yong Convener ka ama maneni inyaksü tekong meranga nokdak, ta WC, NNPG sangdong ajanga ashi.

N.Kitovi ya nisung tain ama taochi aser ajemalu jakla yimya pa dak angutsü imlaa liasü, saka pai atema kisüing bilemba yimya tamajung ajak amshia tiazü jembiba tenzük, anungji pa Naga nunger lenir ta ashitsü metemsü ta ajiteter. N. Kitovi Zhimomi den mapang talangka sendakteper arudang pai dangar yoka achiba yimya amshia chichiba linük meimer aser Naga nunger lenir aika akoksatsüba onok tenük agi nguogo.

GPRN/NSCN nung kisüing masü, saka pai rongsen tali meimba, ochimashi mapa inyakba aser rongsen tsütsü pa ajangzüksü mechi mashi lenmang nung NNPG banner amshiba ajanga pa W/C indang Convener ka ama tesüiba küm tenet inyakdang pa jakla ajak nguogo, ta sangdong ajanga ashi.

Pa Convener ama inyakdang temulung melemtettsüsa senotsü tsütsü inyaksangshiba aser danga yoka achiba yimyatem ajanga W/ C lenirtem aser yangji sendaktepa alirtem tsüingta temulung yirutepa temulung melemtep adokdaksü. Ajisüaka nübur temi mapang talangka nungi solution tekeraba nung aginüba temulung nung yur, pai mapa tamajung inyakba ajunga temulung shiranga aremzüka aru. Pa lenisüba kübok Naga unification tamakok ajurua azüdokshi tali akumba aser telok

aika tentetba angatetsüla, ta WC, NNPG sangdong ajanga ashi.

Agreed Position mesüra Naga political solution ya pa jurila indang masü ta N.Kitovi-i angatetsüla. Agreed Position ya Naga stakeholders ajunga aser W/C, NNPG mesüra danga Naga political group tem teyari nung Naga nunger tejangraba nung zülutep aser aji N/Kitovi-i amshiba yimya nung mashi lenmang nung mamshitsüla.

Naga nunger yimten ken o nung senmanger ama pei sasa tekolak shilem aginüba mapang aliba yong pa kisüing masü saka W/C, NNPG kanga akoksaogo.

Nisungi yangluba arütsü alema oa Naga nunger akhi mapang nungi liyonga aruba litsü-lika wazüka ayutsü W/C lenirtemi inyakba nung N.Kitovi-i tai aputsü merangba ya tesasatsüka lir, kong pai-a shilem agia lir (Agreed Position), koba ajanga India aser ano Myanmar-i agia aliba Naga nunger li atema 'political arrangements' tejangja shia lir.

N.Kitovi-i pa kisüing asoshi bilema Naga nunger yimten ken o yanglusaba nungi W/C, NNPG pilatsü meranger. Anungji tang nungi tenzuka N.Kitovi Zhimomi-i nisung tain ka ama Naga nunger timtemba angateta lungjemshitsü asoshi inyaksü imlar, ta WC, NNPG sangdong ajangasa ashi.

GPRN/NSCN phase 3 buba azüngashitepogo

Dimapur, Tsüklai/February 13 (TYO): GPRN/NSCN pur phase 3 buba azüngashitepba sentong February 13, 2025 nü agia liasü, kong Kilonsers/Deputy Kilonsers aser Tatars züngsem tasen 57 shilem agia liasü.

Iba sentong nung Achumthung Lotha, Chief Secretary GPRN/NSCN menden liasü aser sentong tenzuka Apog, Asst. Chaplain sarasadem aser Hukavi Yephthomi, Kilonser Kilo Affairs ajanga pela agizükba o jembiba liasü.

Jimmy Lotha i/c N.T.H ajanga party discipline zünga ashi aser züngsem ajunga dang Yehzabo sülen ochishia anidaksü ajungshia liasü.

Ato Kilonser N. Kitovi Zhimomi-i tang yimten tensa indang asadanga jembidang Agreed Position koda tongtipang aser ibaji ajanga tarutsü lanu putu dak kongshitsü indang rateta ashi. Paisa züngsem ajunga dang Naga nunger asoshi ochi nung nokdaksü ayongzüka liasü.

Sentong nung züngsem

tasentem asoshi temoatsü meshia Hokiye L.Awomi MRA Kilonser ajanga sarasadem.

GPRN/NSCN Tir R.M Lotha aser Deputy Ato Kilonser Jungshiwati natia iba sentong nung azüngashir ajunga dang yimya tajung alitsü aser Naga Political Issue tsütsü temulungtetba alitsü ayongzüka liasü.

Azüngashitepba mapang ya Ebibemo Lotha, Speaker N.T.H ajanga ketdang süa agi aser lokti sarasadema sentong tembang.

Chessore nung awareness camp ka agiogo

Dimapur, Tsüklai/February 13 (TYO): Ministry of MSME, Government of India kübok MSME Development and Facilitation Office, Dimapur aser Department of Industries and Commerce o District Administration longjemer February 13 nü PM Vishwakarma dak sendakba nung Shamator kübok Chessore Village Council Hall, Chessore nung awareness camp ka agiogo.

Iba sentong ya Chessore yimtsüng Head GB Throngkiuba Yimkhiung-i sarasademer tenzük aser village Council Chairman, Zhelo Yimkhiung-i lokti pela agizükba o jembia liasü.

District Industries Centre, Tuensang Inspector, Thungdi Chang-i sentepa aliba lokti nem

scheme indang aser department kübok inyakyim balala indang metetdaksü. Iba sülen State PMU, PM Vishwakarma-i scheme indang tatongi metetdakja liasü.

State nung tang iba amala mesükba scheme agiyonga oya aliba nung shilem ka ama iba camp nükjiding ya scheme indang tangazükba agütsütsü, PMV portal nung yimtsüngtem züngoksemtsü aser artisans tem züngoksemtsü asoshi lir.

Kasa mapang nung artisan tem aikati Aadhaar nung parnok indang mobile number, residential address melenshiba aser tebur tenüng züngoksmba amala temelenshitem atema apply süogo. PMV scheme kübok artisan tem ajaki Aadhaar nung item osangtem ya metongshitsü nüngdaker.

PM Vishwakarma Scheme ya India sorkari traditional artisans aser craftspeople tem nongita yaritsü atema 2023 küm September 17 nü amenoka liasü. Iba scheme ya, training tajung, hadir tajung aser senotsü teyari agüja artisans tem sempet arangtetshitsütsü nükjiding nung tenzükogo.

Scheme kübok Carpenter, Goldsmith, Potter, Barber, Cobbler, Sculptor, Tailor, Washerman, Boat Maker, Mason, Armourer, Blacksmith, Hammer and tool Kit Maker, Locksmith, Stone Breaker, Basket/Mat/Broom Maker/Coir Weaver, Doll & Toy Maker, Garland Maker, Fishing Net Maker amala mapa 18 züngoka lir. Tang Carpentry, Masonry aser Tailoring ya centre nung sota lir.

Ex-PAN senden ayonger

Dimapur, Tsüklai/February 13 (TYO): Ex-Parliamentarians Association of Nagaland (Ex-PAN) Executive Council senden ka February 21 nü Nagalard Legislative Assembly guest house Darogapathar, Dimapur nung 11 ako nungi tenzükba amentsü ta metetdaksüogo.

Iba senden nung ketdangpurtem, Advisors,

Executive Members (District representatives) aser Special Committee Members tem ajaki shilem agitsü.

Senden dak sendakba nung tir Joshua Sumi aser General Secretary Tarie Zeliang nati züngsem ajak tamakok maludaksüi jangrabangra arua shilem agitsü mepeshia metetdaksüogo.

East Dimapur Town Council-i metetdaksür

Dimapur, Tsüklai/February 13 (TYO): East Dimapur Town Council office sangdong ka ajanga, East Dimapur Town kübok jurila mesüra commercial ki yanglutsü atema construction permit office-i agütsütsü ta metetdaksüogo.

Anungji nüburtem dang ki asü metenzük tsüngda EDTC office nungi construction permit agizüktsü metetdaksüogo, aji ta asünungdang ozüng alema kisüjensüba aser ali atsüngba aziöktettsü, ta kasa sangdong ajanga metetdaksü.

NPO ajak NGO Darpan Portal nung züngokemtsüla

Dimapur, Tsüklai/February 13 (Agencies): Deputy Commissioner, Kohima office sangdong ka ajanga Non-Profit Organisations (NPOs) ajak NGO Darpan Portal nung züngoksemtsü nüngdakba metetdaksüogo.

Planning & Transformation Department-i agütsüba Office Memorandum aser Prevention of Money Laundering (Maintenance of Records) Amendment Rules, 2023 dak ajemdaker Ministries/Departments of the Government of India aser State Government nungi grants tem bushiba, bank account lapoka amshiba, Foreign Contribution Regulation Act (FCRA) status register/renew asüba mesüra

Income Tax Act Section 80-G kübok taitok meshiba Non-Profit Organisations (NPOs) ajaki NITI Aayog-i achaaayangba NGO Darpan Portal nungi Unique Identity Number ka meshitsüla.

Central sorkar ministry aser department temi tashioktsüba tajemba kümdaksütsü asoshi Darpan ID ya mandatory kümdaksüogo.

Anungji Societies Registration (Nagaland Third Amendment) Act, 2008 kübok züngoksema aliba NPOs aser lokti tentet ajak dang registration thitsüba nungi jenboa alitsü atema register süa NGO Darpan Portal nungi Unique ID ka agizüktsü metetdaksüogo.

Longleng District atema PMVS asoshi awareness camp ayonger

Dimapur, Tsükali/February 13 (TYO): Deputy Commissioner Longleng, W. Manpai Phom, NCS-i sangdong ka ajanga, Longleng District atema Pradhan Mantri Vishwakarma Scheme dak sendakba nung Awareness cum GP Onboarding Camp February 19 aser 20 nü agitsü ta metetdaksüogo.

VCCs, VCMs, VDB Secretaries, artisans, aser ward representatives ajak dang February 19 nü DC office Longleng nung camp nung shilem agitsü metetdaksüogo.

February 19 nü DC office

Longleng nung item block-i shilem agitsü:

Longleng Sardar kübok: Hukphang, Lingtak, Orangkong, Hamlikong, Bihumnyu, Dungkhao, Mongkong, Pongching, Oulam, Mongtikang and Oushok village.

Yongnyah Block kübok: Chingong, Shamshang, Yongshei, Yungja, Tangha, Amosen, Nyang, Chingshang, Mechong, Yongam&Yongnyah village.

Yachem Block kübok: Yachem, Noksosang, Toiching, Y a o n g y i m c h e n ,

Alayong&Sanglu village.

aser Sakshi Block kübok: Sakshi, Yimchong, Auching, Yangching, Yungsham, Yongphang, Mungkhu, Pongo, Hongnyu&Meyangkhang village.

February 20 nü ADC office, Tamlu nung item block tem yagi shilem agitsü:

Tamlu Block kübok: Tamlu, Ametchong, Kangching & Ngetnyu village.

Buranamsang Block kübok: Buranamsang, Shamnyuching, Ngetchongching, Namhaching, Shetap, Apoji, Ladigarth & Yonglok village.

Meghalaya: UDP tir Bhoirymbong-i VPP aitsü

Shillong, Tsüklai/February 13 (Agencies): UDP working president Paul Lyngdoh-i Meghalaya nung Voice of the People Party (VPP) aitsüogo aser ashiba agi, parnok lenisüba yimya ya "authoritarian" lir, kong nisung kati dang telemtetba ajak agir.

Bhoirymbong nung election atema nüboyimba sentong ka nung o jembiba mapang Lyngdoh-i ashiba agi, VPP ama masü UDP-ibo lanur lenirtem anitetba aser sensaksem ajanga telemtetba agiba dak tamang akar.

Paisa, UDP-ibo ajak longjemer len anitsüba meranger saka VPP inyakyim yabo dictatorial lir.

Lyngdoh-isa, VPP tekolakba aitsüogo aser ashiba agi, party ticket ya candidate ya constituency nung voter asü masü mesüra nüburtemi meteta ali mali masadangi agütsüogo. Ajisüaka UDP-ibo candidates shimtsü atema tekübokba jenjang nungi tenzükba sensaksema liasü, ta pai ashi.

Maneni Lyngdoh-i, Khasi Hills Autonomous District Council (KHADC) kübok scheduled

areas tem nung building bylaws benokdaksütsü atema UDP-i jenjang tapet agia Sorkar nem mulunga kümdaksüba takok indang lemsatetp.

Pai ashiba agi, iba ya council atema takok tulu ka, koba Titosstarwell Chyne lenisüba nung ajanzükogo.

UDP working president-isa, ken o tongtibangtem nung VPP-i maneni jenjang agiyonga maoba atema parnok aitsüogo, kong VPP lenirtemi anir MUDA encroachment anema longkak aitba kecha tongpoka motetba densema lir.



BBBP scheme benoker küm 10 ajungba nüngdem nung February 12 nü SDO office, Shamator nung signature campaign ka agiogo. World Bank nung ketdangsür Junko Onishi, Program lead of World Bank for Northeast Region and Hill States, Deputy Project Director NECTAR, AveluRuho, NCS aser SDO (C), Athrong nungeri iba signature campaign nung shilem agia liasü. Chessore subdivision kübok yimtsüng lenirtemia iba sentong nung shilem agia liasü.

STF Assam-i Ansarullah Bangla Team operative ka apu



Guwahati, Tsükali/February 13 (Agencies): Assam Police Special Task Force (STF)-i, Ansarullah Bangla Team (ABT) aser Jamaat-ul-Mujahideen operative tongtibang ka puogo.

Sepaitemi pua alisang ya Abu Salam Ali ta jangjaogo. Pa ya February 12 nü Chennai nung pua liasü.

Osang ajanga ashiba agi, Ali yagi extremist faction tem tashi itshidakja national security

amokmerentsü atema inyaksangshia liasü.

Pa Nur Islam Mandal aser Shahinur Islam densema tanga operatives tem dena kanga junga sendaktepa liasü.

STF Assam aser Andhra Pradesh o Tamil Nadu Police longjemer meita aoba sentong ka benoka liasü.

Pa ya Unlawful Activities (Prevention) Act, 1967 aser tanga temzüng ozüng tapet kübok aija puogo.

Modi-i US Intelligence Director Tulsi ajuru



New Delhi, February 13 (Agencies): Ato kilonser Narendra Modi tang United States nung lir; pai US Tir, Donald Trump ajurutsü jakdang Washington D.C nung US Director Of National Intelligence (DNI), Tulsi Gabbard ajurua senden menogo.

Bodhbarnü Gabbard Director of National Intelligence shimba jangjaogo, aser iba atemaji Ato kilonser Modi-i la nem tenüngsang agütsü.

Tesülen Modi-i X ajanga, "Washington D.C nung USA Director of National Intelligence, Tulsi Gabbard ajuruogo. La Director shimba

atema la nem tenüngsang agütsüogo. La den US-India tsüngda lenla balala nung tesendaktep atema o lemtepogo," ta metetdaksü.

Modi tayimtsü ajanga US tonga aoba mapang nung tayimtsü anendak India's Ambassador to US, Vinay Mohan Kwatra den ketdangsertemi pa agizüka liasü.

January ita nung Trump-i Tir tenangzükba agiba sülenbo tang mezüng Ato kilonseri US semdang. Pa airport tonga aoba sülen Blair House-i ao. Yangji India nungertemi "Bharat Mata Ki Jai" aser "Modi, Modi" ta ayimdena pa agizüka liasü.

US tonga aoba sülen Modi-i, pai Trump ajurutsü aser India-US Comprehensive Global Strategic Partnership yanglutsü yongyar, ta metetdaksü.

Modi-i X ajanga, "Washington D.C tonger mapang tatsüka süiogo. @POTUS Donald Trump ajurutsü aser India-USA Comprehensive Global Strategic Partnership yanglutsü yongyar. Asen nüburtem aser asenok aliba lima tajungba akümtsü atema asen linük anati longjemer inyaksü," ta lemsatapa liasü.

Ministry of External Affairs (MEA) otongdar, Randhir Jaiswal-i, Ato kilonser Modi-i US semdangba mapang nung pai Tir Trump ajuruba den külemi US cabinet aser industry nung lenirtem ajurutsü, ta metetdaksü.

US-i apusoa aotsü jakdang Modi-i, tang pai US semdangba ajanga tamalen longjemer inyakba nung takok anguba sülen maneni amalitepa inyaksü atema maongka angutsü aser linük ana tsüngda tesendaktep ano tajungba akümtsü atema jembitsü, ta metetdakja liasü.

US nungi maneni India nunger aika meindoktsü

New Delhi, February 13 (Agencies): Tawa US sepaitem tayimtsü ka nung ozüng alema US nung oa alir India nunger 104 anir aruja liasü; maneni ano tayimtsü ka nung February 15 nü ozüng alema US nung oa alir India nunger aika anir arutsütsü.

Tamalen United States nungi aruba tayimatsüji Amritsar nung anenzüka liasü aser February 15 nü aruba tayimtsüji Amritsar nungsa anenzüktsü.

Ozüng alema US nung oa alir India nungertem anir arutsüba tayimtsütem Amritsar nung anenzükba dak sendakba nung mangatettep adoka lir.

Punjab Finance Minister Harpal Cheema-i, Centre nung BJP-i aniba sorkari metetsümonga Punjab anema inyaker, ta aitsüogo.

"US nungi meindokba India nunger anir arutsüba tayimtsü Amritsar nung anenzükba ajanga sorkari Punjab tenüng menüksün. Kechiba Haryana mesüra Gujarat nungbo manenzüker? Iba ya BJP-i Punjab tenüng menüksütsü atema inyakba lir. Iba tayimtsüji Ahmedabad (Gujarat) nung anenzüktsüla," ta Cheema-i ashi.

Tamalen Foreign Secretary, Vikram Misri-i, US-i India nunger 487 meindoktsü osang metetdaksüogo, ta metetdakja liasü.

Tang US nungi meindokba India nungertem ya tim masüba lenmang balala ajanga US

telungi ia liasü.

February 5 nü mezüng India nunger 104 ji tayimtsü nung tetsüng-teben ajak chain lisü agi alener aruba dak sendakba nung mangatettep adoka liasü.

Iba dak sendakba nung Misri-i, iba atemaji India sorkari US ketdangsertem den tongtepratepa jembitsü, ta metetdakja liasü.

Rajya Sabha nung jembidang External Affairs Minister S Jaishankar-i, US nung ozüng alema oa alir India nungertem meindokba ya tang tasen masü; 2009 küm nung tenzüka tang tashi nung ozüng alema US nung oa alir India nunger 15,668 meindokogo, ta metetdakja liasü.

Osangbener den jembidang advocate KK Mannan-i, US nungi meindokba India nungertem nem India nung temerenshi magütsütsü, ajisüaka parnok kari danga taila documents bener ao süra temerenshi agütsütsü, ta metetdaksüogo.

February 5 nikongdang US sepaitem indang tayimtsü ka nung US nungi meindokba India nunger 104 ji Amritsar yimti nung aliba Shri Guru Ramdas Ji International Airport tonga aru.

US nungi aruba India nunger 104 nungjagi 30 bo Punjab nungi liasü; Haryana nungi nisung 33, Gujarat nungia nisung 33, Maharashtra aser Uttar Pradesh na nungi nisung asemsem aser nisung ana Chandigarh nungi liasü.



February 13, 2025 nü Bengaluru nung Aero India 2025 agidang BJP MP, Tejasvi Surya-i HTT 40 tayimtsü ka nung mendangba sülen tangokba noksa nung angur.

Finance Minister Sitharaman-i Income Tax Bill tasenba benok

New Delhi, February 13 (Agencies): Brihostibarnü Lok Sabha senden nung Finance Minister Nirmala Sitharaman-i Income Tax Bill, 2025 benokogo.

Iba Bill benokdang opposition party temibo iba bill anema longkak aita liasü.

Sitharaman-isa Lok Sabha speaker dang Income Tax Bill, 2025 ji Lok Sabha Select Committee ka nem agütsütsü mepishia liasü.

Income Tax Bill tasenba ya linük nung tesüiba küm aika aliba income tax ozüng tejentem melentsü nükjidong nung

benoker. Iba Bill tasenba nung April 1 nungi tenzüka ita 12 ji 'tax year' asütsü. Income Tax Bill tasenba nung oshi tongmelang asütsü, ozüng kar indoktsü aser oren tatsüba amshitsü.

Iba Bill tasenba nung saru tasen mali saka Income Tax Act, 1961 nung aliba sarutem lir.

Iba Bill nung section 536, chapter 23 aser schedules 16 lir. Iba bill ya agizüka ozüng kümra ozüng tasenbaji sangküm April 1 anogo nungi tenzüka mapa küma benoktsü.

Bill tasenba nung 'Tax year' alitsü aser 'Previous year' den 'Assessment year' malitsü.

Delhi nung AAP sorkar atsüngdokba sülen light ao tenzükogo: Atishi

New Delhi, Tsüklai/February 13 (Agencies): Delhi chief minister menden nungi anentsü alila aser AAP lenir, Atishi-i, Delhi assembly election nung AAP-i tamakok anguba sülen anogo asemnü tsüngda Delhi nung light ao tenzükogo, ta metetdaksü.

Atishi-isa, BJP-i Delhi ya Uttar Pradesh amai kümdaktsün, kechiyong Uttar Pradesh nungbo mapang shia ghonda aika light oadoker, ta ashi.

Brihostibarnü osangbenertem senden ka nung jembidang Atishi-i, Delhi nung

AAP sorkar atsüngdokba sülen anogo asemnü tsüngda Delhi nung light ao tenzükogo; yimti tesem 40 dak tali nung ligh oadokba osang lir aser nüburtemi inverters ali tenzükogo, ta ashi.

"AAP sorkar kübok power sector kanga junga liasü saka BJP sorkar aruba sülen anogo asemnü tsüngda power sector chirepogo," ta lai metetdaksü.

BJP-i yimsüsütsü memetet aser parnoki Delhi ya Uttar Pradesh ama kümdakja mapang talanglang light power magütsütsü, ta lai ashi.

Atishi-i item o jembiba sülen

aikati social media ajanga la aitsüogo.

Social media nung nisung katibo, "Mezüngbuba nung, 7buba Delhi Assembly kümsük February 15 nung ang atemtsü. Tanabuba nung tang tashibo na Delhi caretaker chief minister lir. Tasembuba nung tang tashi sorkar tasenba metetet aser MLA tasenpurtema tenangzükba magi," ta metetdaksü.

February 5 nü Delhi nung assembly election agi, aser iba election nung BJP-i AAP madak takok ngua AAP sorkar atsüngdokogo.



February 13, 2025 nü New Delhi nung Parliament House kima Kerala nungi MP temi Wildlife Act ozüng yanglushitsü atema takhangba agüja longkak aitdang tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, FEBRUARY (TSÜKLAI) 14, 2025

Langka Nungbosa Atongoktsüla

- Tangsen Lemtur

Tawa Centre sorkari 2025-26 kümsük atema Union Budget nung mapa adokdaksütsü aser skill training atema sen crore aika lemsütsüogo. Yaküm sorkari skill ministry atema sen crore 3,241 lemsükja liasü saka taküm budget nungbo sen crore 6,017 tashi lemsütsübaaji ajanga sorkari linük nung lanurtem teka mapa balala angazükdakja langka nungbosa tatongokdak kadaksütsü nükjidong yur inyakba kuli sayur. Nagaland nunga tazünger teimba-teimba dang akümer, yamaji mapa manguba tebilemtsü-a tuluba akümer. Kibong aika nung tazüngtsü tashi zünger kecha nunga tatongokdak makai tsüraburtem nem mesüdakja alir lanur jenti kümogo. Chirnurtem tazüngba mapang nung rongsen jenti indoka züngdaksür joko tsüraburtem anisüngzüksü mapang süaka chirnurtem mapa manguba aser kibong makümba tebilemtsü khuret abener tsüraburtem aika lir. Lanur aikati pei azüngba yari mapa aginer saka tanü putu nung joko sorkar mapa angutsüji pungmang kümogo. Tazüngbo azüng saka tatongokdak maka, training bo agi saka kecha meinyakner lanurtema aika lir! Iba ya asen lima nung shisaliokim tai asü?, ta meyipa reprangshitsü nüngdaker. India nung industrial putu jakdang kibong shia nung tanurtemi mapa balala angazüka tsürabur tsüngsü nung anidaka aruogo. Ajisüaka tanü putu nungbo kibong shia nung tanur ajak züngdaksür aser tazüngtsü tashi azüngba sülen mapa tajung aginüa bushir, saka mengura aikati aayangba mapa inyaktsüsa akümer. Ajioda degree balala ngur mapa manguba dang nungibo skill training balala agir langka nungbosa tatongokdak akaba tajungba asütsü. Ibayongji India sorkaria school nung vocational training agütsür aser teka mapa balala angazükdaksütsü atema National Skill Mission nung temelung agütsür. Germany nungbo tesayurtemi school nung tanur ka dak sempet aliba asadanger temaba shisaliok bushitsü tuyur mesüra vocational stream tuyur, asenoka yamaji inyaktsü mapang tongogo ta bilemer. Nagaland nung mapa manguba tebilemtsü ajanga Naga nung lanurtem aika state adener tangalen yimti balala nung inyakdar, aser ano aikati yamaji tangalen inyaktsü jangrar. Ano külen sorkar mapa mebusiaka asen state nung aseni inyaketsüsa teka mapabo jenti lir. State balala nungi tzümarthem aika pei kibong yutsür yangi Nagaland nung aruagi mapa tapu balala inyaka kibong mesür jenti asenoki angur; parnoki inyakba mapaji asenokia inyaktet saka meinyaker, kechiyong asenoki 'mapa tilateri, mapa tulu' ta bendangshidanger. Northeast nung kisüjensü mapa inyaker tzümar kar dak alaka local nisungtemi dang shishilembaba aser tilateri mapa ajak inyakba state jibo Mizoram dang asütsü südi. Mizoram nung local nisungtemi dang shishilembaba mapa inyaktsü aser teka mapa balala inyaktsü atema lanurtem ajungshia Mizo nung lenirtemi lanurtem nem training agütsüba den lenmang balala sayur. Mizo nung inyakba ama asen Naga nungeria joko sorkar mapa dang meimlai shishilembaba aser teka mapa balala inyaktsü mapang tongogo. Tarutsü nung langka nungbosa atongoka pei akok mapa inyaktsü atema lanuwayongi school nung tanur shia nem tangatetba shisa agütsütsü nüngdaker aser vocational studies nung taliba rangloktsü mapangi sempeter. Külen teka mapa balala ashitsü lanurtem ajungshiba den külemi sorkaria mapa aika adokdaksütsüsa asalentong yanglua inyaktsüla.

OLEMSABANG

MOLUNGKIMONG LITERATURE BOARD DEN KÜ TEBILEMBA OREN KAR LEMSATEPER

~ K. Tia Longkumer Principal,
Haven Of Hope Seminary. Dimapur.

A. Taoba mapang Mr. L. Kika Pongen-i züluba, Rev. R. Tamsü Imchen-i züluba, ano P. Renthly Jamir-i züluba ocet dak ajemdaker nenok Literature Board-i Tir Yimyim Olemsabang nung züluba ya züngdang ni kü tebilemba den temetongshitsüba oren kar sarasadema lemsateper. Mr. L. Kika Pongen ya Aor tashitawar, shisa taka aser putipuin metetba nisung ka, Mr. P. Renthly Jamir yaa yimtsüyimbu alima puti rajema metetba Ao kin rongnung takutet nisung ka aser Rev. R. Tamsü Imchen yaa Ao kin aser Naga nung rongnung Church History nung M.Th. angur mezünpur Theologian ka lir. Pai züluba Thesis-ji "The problems of Autonomy in Ao Baptist Churches Association" (ABAM) A critical study on the introduction of Christianity among the Ao Nagas (Historical Perspective 2002) lir. Anungji pa ya Ao lima nung Arogo otsü dak sendakba aika kanga junga meteta aliba nübu, pa ya Clark Memorial High School Impur nung tesayur 1986-87 inayak, iba sülen 1998-2024 tashi Discipleship Bible College nung Associate Professor inyakba tesayur ka.

Anungji parnok ajaki Ao kin meima ABAM ajungtsü mechi nung ABAM lenirtem dang pei tebilemba lemsatep nung ABAM ang langzüdaksü nung tajungba asütsü amai nibo pilem. Kechiyong 1872 December ita nung DekhaHaimong (Molungkimong) yimdak Arogo tenzükba otsüji shingaia melenshitsü makok aser iba ya Ao Naga kin rongnung mezüngbuba Khrista dak amangba tamang yimsü nung tetenzükba otsü nung tamendaktak kimungji ya lir. Anungji amangbapur ajaki iba tetenzük otsü jembitsü aser ABAM nung tenzük dang temelenshitsü o ashitsü lira iba atemaji temeden (right) teperi lir. Molungkimong meteni Nagalima nung arogo otsü jembitsü makok. Naga Church (Ao Naga Church) tetenzük otsü jembidang mezüng yimsü agizükdak tesem atema kanga pelashishia pilemtsüla aser Tsüngrem tenüng asangtsüla Küm 150 tejaklen asen Ao kin timtem wara tulu aliba mapang nebou nungertemi Godhula ajurua Dr. Clark den metetteper yimsü tasen bener aruba ajanga tanübo Ao kin aser Naga kin ajak temoatsü ngudakja lir, saka iba ya nenok Molungkimong aser Molungyimsen nung alirtem tetsü-tebou nungeri agizük asünungji nibo ya nenok ajak arok senmang ta angateter. Asen Naga nung yimya agi yim akümdang tekong meda talang pilaa or akümer saka nenok yim anabo kiyong ka razükba amai dang ta nibo pilemer, Nenoki züluba ya kanga shisadanger zülutsüla, kechiyong yimtsüng ka mesüra lokti ka nungi Literature Board-ji yimya agi tangar dang nungi tazüng tashiba kechisarena ajak nung tangatetba temabapurtem dang iba Board nung ya züngsem (member) shima alitsü südi. Anungji Literature Board ama kati züluba nungji aibelen, densema lira par Board members dang masü saka par yimer par lokti ya tangar matsüngdang maak asütsüsa akümtsü. Taoba mapang nenoki züluba ocet nung ni ajitetba kar melenshitsü shidanger Dr. Clark-i Molungyimsen yutsür aodang Milak apu nung Clark ain adoker pa korji ajemzuka yok ta zülusema lir, iba ocetji taoba küm Lenjeter kakat nung T.Senka Ao-i züluba ocet **Atakatam Taku (Page 42 October 2024 vol.x:01)** nung pai shia alibaji; Noel Williamson-i SDO Mokokchung, pa kor Milak apu nungi ajemzuka yokba otsü tejangja zülua lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Las Vegas nung tepuokdak tetsür 100-i Khrista agizüka bapti



Las Vegas nung aliba jail ka nung tetsürtem baptidang tangokba noksa nung angur.

February 13, 2025: Tawa Las Vegas nung aliba jail ka nung tetsür 100-i Yisu Khrista agizükba sülen baptiogo, ta osang ka ajanga metetdaksü. "Asenok ajak menepurtem, asenoki Tsüngrem anema inyakogo aser tashi manga. Laishiba ajanga meimchir ajak temenen nung tsükba indang shia lir. Rome kaket ajanga, ajaki tai menaogo aser Tsüngrem sentsüwangshi metongtet ta ashir," ta God Behind Bars ministry-i metetdaksü. "Asenoki temenen menayonga- metetsümonga Tsüngremi tuyuba tashi mangayonga Pai apu latsüogo. Pai Pa ajaso chir Yisu Khrista ajanga asen menen alangzük. Yisu Khrista timatem. N aser ni asoshi Kangki nung meta. Asen menen atema Pai taküm tenla agütsü," ta ministry-isa metetdaksü. "Yisu Khrista sür shia aruba ajanga asenoki teimla angur. Ajak asoshi Khrista temeim aser taitok lir, tepuokdak alirtem atema-a kasa temeim aser taitok lir," ta ministry-i metetdaksü. Las Vegas nung aliba jail nung tetsür 100-i Khrista agizükba sülen baptiba noksaji ministry indang Instagram nung lemsatep. Parnokisa jail nung baptirtem shia tzü nungi adokdang menürema Tsüngrem nem tenüngsang agütsüba video ka lemsatep. God Behind Bars-i jail nung khenyongi nisung teimtiba baptitsüba sentongji ibai asütsü, ta video caption nung zülua lir. "Tsüngremi jail nunga sayatenya mapa inyaker aser taküm aika melenshitsür. Jail nung asentenshi milak jangrur aser ibaji onok nük agia kulisüa angur. Kanga pelar, Yisu," ta parnokisa lemsatep. God Behind Bars ya jail ministry ka lir. US nung küm shia nisung million 2.3 shi jail nung puoker aser item nisungtem rongnung Khrista osangtajung lemsateptsü atema iba ministry ya tenzüka liasü. Parnok mission ajanga jail nung puoka alirtem aika tamang jenjang ainer, tanela tsütsü taneptsü angur aser taküm aika melenshir. US nung tepuokdak alir shilem 15 shibo taküm piyong tepuokdak ayutsü, ajisüaka shilem 90 jungnüabo mapang ka nungbosa jail nungi chioka loktiliba nung züngoktsü. Ano jail nungi chioker shilem 75 bo küm asem tsüngda tanaben jail nung puoktsüa akok.

Alima tesem ajaklen asentenshi milak jangrudar: Jennie Allen

February 13, 2025: Taküm Gather25 sentong agitsü lia kaketzülur aser sayutsüngir, Jennie Allen-i, lai pongmang nung Yisu Khrista tanaben alimai arua pungmang saka alima renema maliasü, ta metetdaksü. "Iba ya pungmang tajung kabo masü, kechiyong nisung aika pei taküm nung Khrista makai samar liasü," ta lai ashi. Continent ajak nungi Khristantem adenshia Tsüngrem külemtsü, sarasademtsü aser Yisu Khrista tenüng sangdongtsü atema mangdang ka ngur la saaka liasü. February 28, 2025 nü alima tesem balala nungi Khristantem Gather25 atema adenshitsü; iba dak alia linük 183 kübok tesem 10,000 dak tali nung Khristantem adenshia ghonda 25 sarasademtsü. Ibaji alima nung Arogo longjemba tulutiba asütsü. United States nung Gather25 sentongji February 28 anepdang 8:00 ako nung tenzüktsü aser iba sentong agibaji Gather25.com website, TBN aser YouVersion Bible app nung online ajanga live sayutsü. Osangbener den jembidang Allen-i, "Iba ya ajanga nü nem teimla tulu agütsütsü. Alima nung nütsüng billion 2.5-i parnok Khristan ta ashir," ta metetdaksü. "Ajak longjemtsü atema onoki jaoker. Tesem ajaklen nisung ajak nem Yisu aser osangtajung metetdaksütsüji onok nükjidong lir," ta lai metetdaksü. Gather25 nungji Priscilla Shirer, John Mark Comer, Kari Jobe & Cody Carnes, Lui Ponifasio, Christine Caine, Sadie Robertson, Tim Godfrey, Louie Giglio, Matt Redman aser Darlene Zschech nungeria shilem agitsü. US nung agiba sentongji ghonda ishika live sayuba sülen New Zealand nung agiba sentong sayutsü; yamaji Malaysia, India, Peru, Rwanda aser London nung agiba sentongtem-a live sayutsü, ta lai metetdaksü. "Item tesem balala nung ghonda 25 agiba sentongji maneni live sayutsü. Iba ya alima nung Arogo atema tongtiband mapang ka asütsü.

ANOGO ABEN TSÜNGREM DEN

TAJUNG ASOSHI AJUNGSHITEPANG

Aser temeim aser mapa tajung dangi jangratsü asoshi, asenoki kati ka den shisadangtepdi.

Aser kar yimsü ama asenok külemi sentepetsü metoktsüi anogo kodaka anasa aiter, patakaji tali kati ka ajungshitepdi.

~ **lbri 10:24-25**

Tanü asenok aliba tensa ya kodang reprangdangdir, mamangertem jenti züina aoba mapang ka lir. Tesasatsü ka asen kümtetdakba Yisu Khrista dak amangertema aika tanü tenüng agi amangba purtem dang kümer litepdar. Pei tamang kong kechi nung ayur aji meshitetba mapang tensa kati asenok menupadokogo. Yamala mesük tia jenjang ka nung alidang asenok tamangertem asoshi lbri shiti ajanga teimla aser tajungshi O tulu bener arutsür. Kechi tensa ajurudir ajuruaka ochi mulungjang aser tamang tabensaba nung Tsüngrem dak akang akanga ameter alitsü ayongzüker. Alima tenangzükbatem mataloktsü akok aser aji yakta süitemtsü saka Tsüngremer tenangzükba asenok tamangertem asoshi kechi lir aji kodanga mataloki malitsü. Anungji, temeim aser mapa tajung metitemi inyakba nung kati ka ajungshitepdi. Aser anogo ka nungi ka ta Kibubar mapang anasai arudang ano tali dang tamang telungjem nung asenok teimla marakzüdaksüi sota alitsü ajungshiteptsü Lai O ajang ashir.

Külem amangbapur tajungtem kati ka ajungshitepba nung asenoka anünga lira arung tanü nungi na aser nia saksalema mapa tajung asoshi nungnanga melii inyaktsü kati ka ajungshiteptsü merangdi.

Myanmar nung sepaitemi Tenla ki tasen ka poksatsüogo

February 13, 2025: Tan ita iba Arogo nung putir kati parnoki tetenzüklen Myanmar nung Tenla kiji yanglushitsü, ta sepaitemi Tenla ki ka bomb agi poksatsüogo, ta International Yaküm May ita nung shisa lemsatepba senden ka nung jembidang U.N. High Commissioner for Human Rights, Volker Türk-i Myanmar nung sepai yimsüsüba kübok meimchir temeden anema inyakba kanga bulua kümogo, ta metetdakja liasü. January 25, 2025 nü ang Pope Francis-i Sacred Heart of Jesus Church ya 'Cathedral', ta sangdonga liasü. Iba Arogo Tenla ki ya Chin state kübok Mindat nung lir. Iba Tenla ki ya 'Cathedral' ta sangdongba sülen hopta ana majungdangyongi February 06, 2025 nü sepaitemi iba Tenla ki poksatsü. Bomb ji ajanga Tenla ki kilem aser kichiba ajak poksa aser Tenla kiji tashi meiti kümogo. Iba tesem nungji tensa majungba agi nisungtembo jenshir liasü, ibayongji nisung asü-amaba osangbo mali, ta ICC-i metetdaksü. Myanmar kübok Khristan nütsüng teimba aliba state ji Chin state ya dang lir. Iba state nung nütsüng shilem 85 bo Khristantem lir. Myanmar nung nütsüng shilem 90 jungnüabo Buddhist yimsü amangertem lir. Osangbener den jembidang

AO OSHI ANGAZÜKDAK:**TANÜ ANGAZÜKTSÜBA OJANG****Tejang**

(n) süngjang ama telong tilala (fruit type and ball shape material)

* Ozü tsüki nungbo tejang matangba süngdongtem dang lir.


Tejangja

(adv) shitak metetba, reprangtetba (clear, reliable)

* Tejangja nisung nem dang mapaa agütsür.



Tir Yimyim

OLONG PAITEP # 7063**TIPIEN**

2. Sü jeplok
4. O agi merenshi
7. Ayongküm li
8. Chiyungtsümapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

- (4)
- (5)
- (5)
- (4)
- (9)
- (4)
- (5)
- (5)
- (4)

LANGTSÜNGLEN

1. ____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. ____ kibur
13. Tebur tembar tsüngda jatepba

- (4)
- (6)
- (5)
- (5)
- (5)
- (6)
- (5)
- (4)

OLONG PAITEP # 7062 TELANGZÜBA**TIPIEN :**

1. Semtu, 3. Lepko, 5. Bilem, 8. Ulu,
10. Tsünpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER MA

India aser
England na
tasembuba
ODI asayaba
mapang
Shubman
Gill-i pa
asoshi ODI
50buba nung
century ka
yanglua, pa
ya India
nung er



rongnungi asaya 50 nung dang century tenet yangluba mezüngbuba asayar kümogo. Pai ball 95 nung century yangluba ya ano kanga tongtibang lir, kechiyong pa ya kasa tesem nung format asemprongla nung century yangluba asayar pongububa kümogo. Gill-i Narendra Modi Stadium nung Tests, T20Is, aser ODIs nung century kaka yangluogo. Faf du Plessis (Wanderers), David Warner (Adelaide Oval), Babar Azam (National Stadium) aser Quinton de Kock (Supersport Park) nungeria kasa tesem nung format asemprongla nung century yanglur lir. Gill ya ano ODI puti otsü nung run 2,500 takaratiba yangluba asayar kümogo.

Manipur assembly menoa magiba atema Congress-i aitsü**Guwahati, Tsüklai/February**

13 (Agencies): Congress party-i Brehostibarnü sangdong ka ajanga, Indian Constitution Article 174 nung Assembly sessions ana tsüngda ita trok dak tema tawa malitsü ta shia lir, saka Manipur nung iba iyakyim nung aibelenogo aser iba ya asa-a Constitution anema jenjang agiba lir, ta shiogo.

Congress general secretary in charge of communications Jairam Ramesh-i, state nung constitutional machinery chirepba aitsüogo aser Manipur nung aliba nüburtem maneni timtemtepba lemsatepogo.

Paisa, Manipur nung mepetmesü tulu adoker liaka Ato Kilonser Narendra Modi-i tang tashi state semdanga mali, ta ashi. "PM Modi ajak leni aoer saka Manipur-i maoer," ta

Ramesh-i ashi.

Manipur Angh-i Assembly session February 10 nü tenzüksü ayongzüka liasü aser Congress-i benokba no-confidence motion ka sensak asemtsü liasü, ta paisa metetdaksü.

Ajisüaka CM-i pa mapa toktsüba sülen iba parliament session ya "null and void" ta sangdonga liasü, ta Ramesh-i ashi.

"Ita trok süiogo. Article 174 nung aibelenogo. Iba ya kecha masü saka asa-a Constitution anema jenjang agiba lir," ta pai ashi.

"Ajisüaka iba ya kecha taoksatsü mali, kechiyong 2023 küm August ita Supreme Court-ia state nung constitutional machinery ajak chirepba reprangtetogo. Manipur nung

aliba nüburtem maneni timtemtepdar aser parnok PM-i semdangtsü atadar, shiba ajakleni aoner saka Manipur kijai maoer," ta Ramesh-i ashi.

Congress-i Mongolbarnü, Manipur Angh-i kechiba Manipur Assembly mayongzüki iba article anema inyaksangshir ta shiogo.

N Biren Singh-i chief minister mapa toktsüba sülen anogo ishika lir pai iba olen ya lemsatepa liasü.

Congress-i ashiba agi, Singh-i kanga menor mapa toktsür aser state nung aliba nüburtem Ato Kilonseri semdangba atadar.

2023 küm May ita kin o kin tsüngda mangatettep tenzükbä sülen nisung 250 dak tema süogo aser nisung 60,000 dak tema pei talidak ki toktsür jenshiogo.

Assam: Taoba Handloom director Kabita sür lia ngutet**Guwahati, Tsüklai/February**

13 (Agencies): Taoba Director of the Handloom and Textile Department Kabita Deka, Brehostibarnü Guwahati kübok Jalukbari tesem nung lar kidang sür lia ngutetogo.

Osang ajanga ashiba agi, Deka indang tasü mang ya anepdang ngutet aser ken o bushisüngdangba sülen la ya soseta asü asütsü ta ngutetogo.

La asüba dak sendakba nung ken o tejangjaba metettsü atema police temi bushisüngdangdar.

**Kabita Deka**

Chief Minister's Special Vigilance Cell (CM's SVC) kübok ochi mashi ken o nung

Deka densema aliba indang ken o temai adokba sülen tang iba ya atalokogo.

2019 aser 2020 küm tsüngda Handloom and Textile Department nung nisung shimba dak sendakba nung Deka-i ochi meshi-i inyakba atema la aitsür liasü.

Iba ken o bushisüngdangba nung shilem ka ama taoba ita lar ki meita oa liasü.

Iba den bendenloksema Deka ya ano ali ken o ka nung densema aliba puteter liasü.

Manipur nung security force-i prangbong injang aika ngutetogo**Imphal, Tsüklai/February**

13 (Agencies): Security forces-i Brehostibarnü Manipur kübok tenem nung aliba district ka nung prangbong injang aser tanga hadir balala aika puogo.

Police-i ashiba agi, parnoki pua aliba telungpurtem dang ken o ashishiba nungi osang angba sülen state police-i teyari agüja central force temi Brehostibar anepdang Kangpokpi hill district kübok Aigejang Nepali Basti tenemtsüng meita oa liasü.

Meita aoba mapang sniper prangbong ka den magazine, 9 mm pistols pezü, high explosive hand grenades pezü, long-range projector launchers ana aser wireless set ana densema prangbong injang aser bomb

aika ngutetogo.

Sepaitem ngutetba prangbong injang aser hadir balala ya ken o dak sendaka aliba police station nem bendanga agütsüogo.

Kasa mapang nung Manipur police-i Bodhbarnü Imphal West District nung Lamsang-Police Station kübok Kameng Sabal nungi Kangleipak Communist Party- People's War Group (KCP-PWG) züngsem pezü puogo

Police-i ashiba agi, Manipur police aser central force tem longjemer meita aoba mapang telungpurtem ya pua liasü. KCP-PWG züngsemtem ya Takhelmayum Victor (23), Huidrom Vikash Singh @ Sanamacha (25), Oinam

Naocha @ Max (19) aser Awungshi John (33) ta jangjaogo.

Sepaitemi pua alirtem ya tawa rakzükrakdemba maparen balala nung densema liasü, kong Imphal temeket nung nüburtem, dokan balala, stone crusher tem, sorkar tenzükertem, pharmacies nung nungi sen meshiba densema lir.

Police-i parnok ket nungi .32 Pistol asem den injang 7, 9mm Pistol ana den injang 10, 9mm empty case ka, donation card 113, Baofeng handset ka, mobile handsets asem, two-wheeler ka aser notebook ana ngutetogo.

Parnok anema ken o ka benokogo aser maneni bushisüngdangdar.

Ukraine rara indang jembishinü tang tenzüktsü: Donald Trump

Washington, Tsüklai/February 13 (Agencies): US Tir Donald Trump-i Bodhbarnü Russia Tir Vladimir Putin den phone ajanga mapang talangka agia kanga junga jembioغو ta ashi aser Ukraine nung rara tembangtsü asoshi jembishinü tenzüktsü mulungtep.

Pa indang Truth Social sapang nung Trump-i ashiba agik, Russia tir tenati tangsa jembishinü tenzüktsü mulungtepogo.

Mapang tatsüka lir Ukraine Tir Volodymyr Zelensky-ia Trump den mapang talangka aser tamang katettsüsa yimjung indang jemi ta ashi.

Trump aser pa indang defence secretary ajanga Ukraine ya NATO nung züngsem makumtsü amai lir ta ashiba sülen Trump aser Putin tsüngta phone ajanga jemi, koba Kyiv asoshi tejashitsü osang ka lir.

Brehostibarnü Defence Secretary Pete Hegseth-i ashiba agi, linük ana (Russia aser Ukraine) külemi ajurutepdaktsütsü alima nung tashi aliba nisungji Trump kisüng lir aser US-i yimjung asoshi jembishinütsü merangba ya Russian sepaitemi amakba den rara aliba Ukraine sepaitem ashioKtsüba masü ta nenshia ashi.

Aji masü dang Trump-i social media nung, "Iba temenünütsü rara anentsü mapang tongogo, kong khenyongi menü ngdakba nung nisung asü aser tesama ajuru. Tsü ngremi Russia aser Ukraine nüburtem moajang!" ta zülua liasü.

Pai Putin den tejak o tejak chitepa senden amentsü atema anogo melatet saka mapang tatsüka lir White House nung osangbener dang "Onok Saudi Arabia nung ajuruteptsü," ta ashi.

Paisa social media nung tena kati ka dang pei linük yimtibai jaok ta ashi.

Zelensky-i Hokulbarnü Munich nung Ukraine indang defence summit alidang US Vice President JD Vance aser Secretary of State Marco Rubio ajurutsü ta ashi.

Külemi inyaktsü mapang tongogo ta Trump-i angatetba Putin-ia agizüker, ta Kremlin odongtar Dmitry Peskov-i ashi.

Putin aser Trump tsüngta phone ajanga ghonda ka ser

tesadang jungnüa jembidang Russia tiri Moscow semdangtsü jaok, ta Peskov-i ashi.

Trump-ia White House nung osangbener den jembidang Ukraine ya 2014 mapang arütsü dangibo marutsü amai lir, saka ali kar meyipa arutsü amai ta ashi.

Hegseth-i ashibaji shidak ta tiria ashi, shibai Bodhbarnü NATO senden ka alidang Ukraine ya iba military alliance nung madentsü amai lir ta shia liasü.

Brehostibarnü Brussels nung defence senden amentsü lia osangbener den jembidang, Russia-i Ukraine amakba ya NATO asoshi "factory reset" ka lir aser ibaji ajanga alliance ya asangsang nung tashi ita alitsü nü ngdakba sayur, ta Hegseth-i ashi.

US-i NATO asoshi bendanga agütsür inyaker aser külem züngsem temia defence tsütsü senotsü indokba timba akumtsüla, ta Hegseth-i ashi.

Ukraine asoshi US-i inyakba dang tuluba linük katia inyaka mali ta pai ashi.

Bodhbarnü Britain, France aser Germany densema European linük teneti Ukraine tia asoshi jembishinüba nung shilem agitsü nenshia ashi.

Parnoki Ukraine atema security guarantees tashi ita yanglutsü ayongzüker aser iba atema American allies den tarutsü asoshi jembishinütsü yongya atar ta ashi.

US administration tasenba yagi taoba mapa inyaka alir dang nungi tajemba Ukraine reprangtsü ta meteta lir, aser Trump aser par defence sec-

retary ajanga jembiba o agi Moscow ang pelar.

Zelensky-i Ukraine medeni Ukraine indang mejembitsü ta ashir, saka Trump o Putin na phone ajanga jembiba yagi balaka sayur.

Anüolen linük temi yariba ajanga Ukraine sepaitem tang tashi Russia den nokdaker rarar.

Ajisüaka Ukraine asoshi yimjung lenmang kanga teindang masütsü.

Ukraine tiria Trump den ken o balala atema junga aser jangja-jangja jembishinüogo ta ashi aser US Treasury Secretary Scott Bessent ajuruogo ta ashi.

"Ukraine-i aginüba ama shingaia yimjung maginer. US den külemi Russia-i tashiyim amshiba anentsü aser mapang talangka aser tamang katettsüsa yimjung alitsü atema mera agitsü shisadanger," ta Zelensky-i zülü.

"Onoki ano osang agiteptsü aser senden tem amentsü atema sentong yanglutsü pangjem," ta Ukraine lenir-isa ashi.

Mongulbarnü The Guardian den sensaksema mapang, Ukraine nung Russia-i rakzüka aliba tesem ya Russia anüolen Kursk region nung Ukraine kübok aliba tesem den melenteptsü akok, ta Zelensky-i shia liasü.

Saka Putin odongtar Peskov-i ibaji tamakoktsü ta shiogo. "Ozü litsü-lika melenteptsü atema Russia-i kodanga mejembi aser mejembitsü. Ukrainian units tem iba tesem nungi meindoktsü. Mesamai alirtem ajak meindoktsü."

Israel nunger pua alirtem maneni chioktsü: Hamas

Gaza City, Tsüklai/February 13 (Agencies): Hamas-i Israel den Gaza ceasefire zü ngzüktepba ama inyaktsü temulungtetba nung lir aser anogo atakteta aliba ama pua alirtem maneni chioktsü ta ashiba ajanga rara tenzüktsü aliba paidoktsü südi ta teimla angur.

Cairo nung jembishinüba sülen Egypt aser Qatar nungi tetsü ngtai ia yimjung ken o jembirtemi tetsükdaktsü agientsütsü ta jangja shiogo, ta Palestine nunger telungpur telok yagi ashi.

Israel nungi telangzüba kecha mali. Saka Egyptian aser Qatari osangtem nunga telok ana tsü ngta tawa alidak apu latsüogo ta ashi aser anaprongi maneni inyaktsü temulungtetba lir ta ashi.

Hamas-i pua alirtem Honibarnü tashinung meyipa meyokra ceasefire tembangtsü, ta Israel-i Mongulbarnü shia liasü. Aji masü dang Israel-i aibelenba mechi pua alir chiokba maparen thinener ta Hamas-i shia liasü.

Hamas-i ashiba agi, süki aser jenokdak tesemtem densema nisung asoshi tongtipang teyari yoktsü mulungtepba ama Israel-i meyoker.

Hamas-i iba tezü ngzüktep raksatsü amokmerenba yong US Tir Donald Trump-i Israel dang iba agreement athitsü aser Honibarnü tashinung pua alir ajak memeyiptsüra molumi sapokdaktsütsü ken o bendang.

Israel Ato Kilonser Benjamin Netanyahu-ia Trump-i akhangba pelashishia agizüker ta ashi aser "Hamas-i pua alirtem Honibarnü teroto tashinung memeyiptsüra ceasefire tembangtsü aser Israel

mitkari rara tenzükshitsü," ta shia liasü.

Ajisüaka Netanyahu yagi tang Gaza nung alir nisung 76 prong chioktsü akhanger asü mesüra tezü ngzüktep kübok hopta tatemi asem chioktsü aliba indang jembir-ar Israel ketdangsür temia tejangja meshiteter.

Brehostibarnü Hamas-i sangdong ka agütsüba nunga caravans, süki, heavy construction equipment, medical supplies aser totzü densema tezü ngzüktep nung aliba nung rangloker, ta ashi.

January 19 nü ceasefire tenzükba sülen anogoshi Gaza telungi teyari oset aliba gari tulu noklang aika aitdaktsür.

Ceasefire tezü ngzüktep phase mezü ngbuba ya ita trok tali ashitsüla, aser iba mapang Israel nunger pua alir nisung 33 chioktsü aser iba melen tepuokdak yua aliba Palestine nunger 1,900 shi chioktsü.

Tang tashinung iba ceasefire tenzüker Israel nunger pua bener aoba takum 16 chiokkogo. Iba tezü ngzüktep nung meliaka Hamas-i Thai nungera nisung pongu chiok.

Mezü ng phase nung chioktsü aliba Israel nunger 17 rongnung tanur ana, tetsür ka, tebur pongu arishi küm 50 tema aser 50 arishi küm 50 tekübok lir. Parnok ya taruba hopta asem tsü ngta Israel nem agütsütsüla. Telok anaprongi item nisungtem rongnung par ti süogo ta ashir saka nisung ka tenü ng dang sangdonga lir.

Ceasefire phase tanabuba atema jembishinü ano metenzük, kong tanü ngba hostages 43 chioktsü, Israel mitkar ajunga ainshitsü aser teti atema ceasefire alitsü.

Munich yimti nung gari agi nisung 28 yirutsü

Munich, Tsüklai/February 13 (Agencies): Germany nung aliba Munich yimti nung nisung telok ka alidak gari ka anir oa tsükshia nisung 28 yirutsü aser kar kangasa mejungi yirur lir, ta ketdangsür temi ashir.

Munich tiyong nung Brehostibarnep 10:30 ako meta atalokba lendong indang ketdangsür temi osang tejangja magütsür, anungji nisungtem dak asaa atsük asü masüar mejangjar.

Police temi social media sapang X nung driver iba tesem nung puogo aser joko

lendong mali ta ashi. Iba lendong atalokdak Mini Cooper teraksa ka nguogo.

Iba lendong nung nisung 28 yiru aser ana kangasa mejungi yirur lir, ta fire service ajanga ashi.

Iba gari anisang ya arishi küm 24 tain Afghan nunger asylum bushir ka lir aser taoba mapanga temesepba mozü dak sendakba aibelen aser oset tila-teri auyaba mechi police temi pa meteta liasü.

German Chancellor Olaf Scholz-i iba lendong aitsüogo.

"Munich nung lendong atalokba angashia aoksar. Iba mapa tamajung inyaker nem ozü ng tashi metetdaktsütsüla," ta pai Brehostibarnü social media sapang X nung zülua liasü.

Munich May mesüra Dieter Reiter-ia iba tatalokba ajanga pa kanga aoksa ta ashi aser yirur alirtem rongnung tila tanur dena lir ta ashi.

Iba lendong atalokba mapang service workers union ver.di ajanga longkak aita liasü aser yirur tem rongnung longkak aiter densema ali asü maliar


mejangja.

Taruba hopta federal elections agitsü lia iba tatalokba ajanga security saksalemer.

February 23 election nung migration ya tongtipang onük ka sür nisung million 60-i vote agütsütsü.

Hokulbarnü nungi tenzüka asemnü Munich Security Conference nung adentsü asoshi United States Vice President JD Vance aser Ukraine Tir Volodymyr Zelensky nunger densema linük balala nungi lenirtem iba yimti nung adenshiba mapang iba lendong ya ataloker.

BAMTC: India-i 2-3 agi S Korea makok



Sathish Kumar
Karunakaran

Tsüklai/February 13, 2025

(Agencies): Tang asaya aliba Badminton Asia Mixed Team Championship nung Brehostibarnü Group D nung India team-i 2-3 agi South Korea makok, saka parnok tanabuba jenjang nung tembanga quarterfinal-ibo iatokogo.

India team-i Bodhbarnü Macau 5-0 agi ayong ayonga akok aser Korea

dena tatem tashi kanga meranga asayaogo. Sathish Kumar Karunakaran aser Gayatri Gopichand aser Treesa Jolly nungeri asaya ana mekoki liaka meranga asaya-a team nem timla agütsü saka teperi masü asü.

Result:

Dhruv Kapila/Tanisha Crasto nati Ki Dong Ju/Jeong Na Eun 21-11, 12-21, 15-21 agi makok

Malvika Bansod-i Sim Yu Jin 9-21, 10-21 agi makok

Satish Karunakaran-i Cho Geonyeop 17-21, 21-18, 21-19 agi akok

Gayatri Gopichand/Treesa Jolly nati Kim Min Ji/Kim Yu Jung na 19-21, 21-16, 21-11 agi akok

MR Arjun/Satwiksairaj Rankireddy nati Jin Yong/Na Sung Seung na 14-21, 23-25 agi makok.

Asaya nung mezüngbuba asaya tarep temeyoktep asaya saka Dhruv Kapil aser Tanisha Crasto nati asaya makok aser tetsür kija asaya nunga Malvika Bansod-i asaya mekoki liasü.

Iba sülen tebur kija asaya nung Sathish-i 17-21, 21-18, 21-19 agi Cho Geonyeop koka India team jenjang junga kümdaktsü.

Tetsür tarep asaya nung Gayatri aser Treesa nati maneni India nem timla agüja 19-21, 21-16, 21-11 agi Kim Min Ji aser Kim Yu Jung na koka 2-2 aküm.

Ajisüak tebur tarep asaya nung Satwiksairaj Rankireddy aser MR Arjun nati Jin Yong aser Na Sung Seung na mekoki liasü.

Rajat Patidar RC Bengaluru captain kümogo



Tsüklai/February 13, 2025

(Agencies): Indian Premier League (IPL) club Royal Challengers Bengaluru (RCB)-i Brehostibarnü par team captain asütsü atema middle-order batter Rajat Patidar shimogo.

RCB captain tasen sangdongba sentong nung Patidar ya blue blazer aser red cap semer liasü aser pa den sabang nung Andy Flower, Mo Bobat aser Rajesh Menon nungena dena liasü.

Patidar shimba indang jembiba mapang club COO Rajesh Menon-i ashiba agi, "RCB atema iba ya kanga telemtetba tasak ka liasü.

Onok rongnung asayar tejentema densema lir. Iba telemtetba agitsü temela masü asü. Iba telemtetba ya franchise asoshi taruba küma ishika atema tajung asütsü ta amanger," ta pai ashi.

Virat Kohli nem captain mapa abentsü maongka agütsüba magiba sülen RCB-i captain shimtsü atema mapang tatsüka agiogo. Taoba küm November ita mega auction mapang captain ka malitsü telemtetba agiba sülen parnok asayartem rongnungi lenir shimtsüsa aküm.

Sources-i ashiba agi, RCB nung India nunger

asayar tejentem den sensak asema sülen Rajat Patidar shima liasü.

Team-i all-rounder Krunal Pandya-a asadanga liasü, shibai lenisütsü tajangshiba bena lir aser franchise indang strategic planning nung densema aruogo.

Patidar ya mega auction magi tsüngda RCB-i sen crore 11 agi meyipa agia liasü. Pa den Kohli sen crore 21 aser Yash Dayal sen crore 5 agi agia liasü.

Patidar lenisüba nung Madhya Pradesh team taoba küm Syed Mushtaq Ali Trophy final tonga asaya aser Mumbai sülen tanabuba jenjang nung tembanga liasü. Iba asayamung nung team junga aniba dang masü saka pai kanga junga asaya-a run 428 yanglu aser pa asayamung nung run timtiba yangluba asayar rongnung tanabuba liasü.

Patidar nem captain mapa magütsü tsüngda Rahul Dravid, Daniel Vettori, Shane Watson, Kohli, Faf du Plessis, Shane Watson aser Anil Kumble nungeri RCB captain mapa benogo.

Amit professional asayar kümogo

Tsüklai/February 13, 2025

(Agencies): India nunger tebur asayartem rongnungi world championship nung silver ngur alisang Amit Panghal professional asayar kümogo.

Pa ya India nunger boxer tem rongnungi takok timtiba anguba asayar ka lir aser pai US nung amendaker aliba management company Critical Sports and Entertainment den tenangzüktepba yangluogo.

"Critical Sports and Entertainment-i alima nung nüngtugu Olympian boxer Amit Panghal den tenangzüktepba yangluba sangdonger," ta agency-i Instagram nung zülutsü.

"Pa professional akümba mapang Amit ya tajangshiba aika bener aliba asayar ka dang masü saka pa skill tajung aser takoker shisatsü bena aliba nisung ka lir. Co-manager Connor Burke den onoki pa Critical Sports and Entertainment kibongi pelashishia agizüker aser pa career nung tapak tasen ka lapokba mapang len sayutsü yongyaseta atar," ta kasa sangdong ajanga metetdaktsü.

Haryana nungi boxer, shiba amateur circuit nung 51kg category nung asayar, pa tang tashi professional asaya ka danga asayatsü lemezüka mali.

World championship bronze-medallist Nishant Dev professional boxer akümba sülen ita ka dang lir Panghal-a professional asayar kümogo.

Panghal ya taoba mapang world number one asayar liasü aser pai Olympics dak alak international asayamung tongtibang ajak nung medal nguogo.

Panghal-i, Asian Games aser Asian Championships nung gold medal aser 2019 World Championships nung silver medal ngua liasü.

Ajisüaka pa taoba küm pezü tsüngda international asayamungtem nung kangabo masayar. Tokyo Olympics nung kanga kara tsukatokba sülen pa Indian team nungia tuguogo.

Iba sülen pai 2022 Commonwealth Games nung gold angu aser Paris Olympics atema qualify süa liasü, kong pa pre-quarterfinals nung Zambia nunger Patrick Chinyemba-i tsükdaktsü.

Havertz yirur masayatettsü

Tsüklai/February 13, 2025

(Agencies): Arsenal nungi asayar Kai Havertz Dubai nung training camp mapang yiruba sülen club asoshi ano takoksa tulu ka ajangshiogo.

Osang ajanga ashiba agi, arishi küm 25 tain Germany nunger international asayar ya hamstring shisaogo aser pa season nung tanungba asayatem nung masayatettsü.

Athletic sangdong ka ajanga ashiba agi, pa surgery agitsü magitsü mejangja, saka pa tang asaya aliba season nungbo joko ojang dang asayatettsü.

Winter transfer window nung attacker ka danga malizükba sülen Arsenal pur forwards nung asayatsüpur anünga kümogo.

Gabriel Jesus-a ACL surgery agiba sülen season tepeyong masayatettsüsa küm aliba mapang ka nung tang Havertz yiruba ajanga manager Mikel Arteta nem timtem agütsüdar.

Bukayo Saka aser Gabriel Martinelli nata hamstring

yirur masayai lir.

Asayar aika yirur aliba mapang tang team nung forward asayatsü asoshi Leandro Trossard, Raheem Sterling, aser arishi küm 17 tain Ethan Nwaneri nunger anungogo.

Havertz form nung maliba aser Gabriel Jesus' mapang talangka masayatetteüsa küm aliba mapang ka nung Club-i February 3 nü transfer window meshibang tsüngda asayar alizüktü asü.

Arteta-i, January transfer window nung forward ka alizüknüa liasü aser Aston Villa nungi asayar Ollie Watkins alitsü merangdanga liasü.

Arsenal pur Premier League nung tang tanabuba jenjang nung lir aser parnoki Liverpool point trok agi memenepe lir.

London nung amenkr aliba iba club yagi 2004 küm nungi tang tashi title ka danga bena mali aser parnok taoba season ana runner-up nung tembanga liasü.

BILEMDANGANG

"Aibelen menatsü tsüburtemi
kecha minyaktettsü."